



類說目錄卷之四

西京雜記

綈几

常滿燈

七夕穿針

九枝燈

珠襦玉匣

菊酒

飲酎

連枝草

遠方異果

紫泥璽室

寶跗

金弮環

吉光裘

金屋貯阿嬌

王搔頭

歲星不見十八年

蚕文石

龍生九子

相憐愛

竹下圍棋卜

九逸

戲象

東閣三館

寧逢惡賓無逢故人

佳城

蛟龍入懷

字挾風霜

塵落帽飛

鷓鴣裘

白頭吟

作美人賦

夢黃衣翁

枚馬文章

此中多有

日擘得酒食

算術

乳母告急

五侯鯖

金彈丸

懷鈿提槩

單鵠寡鳧

夢白鳳

蒲桃錦散花綾

讀賦千首

至誠金石為開

三雲殿

金衣菊裳

凋胡

幽王家

病坊雜記

病坊

紗籠中人

則天改新字

民間列榜

念珠廳

佛袍集

秦京雜記

唱杖

佛牙

報羅使

繩樞之戲

內人科

音聲樹

漢陂

石橋上上行馬

壓驚錢

市語

鷄粟

隨駕老鴉

番禺雜記

五羊

火宅僧

雷藏

雷郎

看潮

歌堂

臘一伏二

水鑿

盪風

占卜

瘴母

鬼市

諱藿

以玉抵鵲

鯨帆

鍊風

杏潮

潮田

天蛤

稻孫

合歡菜

魚子草

競火樹

大業雜記

船脚

沉香堂

圖經

四時飲

五香飲

芝草

玉箱雜記

二龍

繡虎

伏鸞隱鵠

擲玉於門

無愁酒

三榮三悴

藏鈎

青箱雜記

魏野獻詩

藥名詩

下觀楊子小

五更三七上八

官職是國家底

馬道詩論

上壽失容

張齊賢詩

望火馬日遊神

香印

避諱

父名岳不聽樂

諱取枉法賊

看尚書詩

水津為步

村市為虛

痰市

秀才可低處過

斫頭留項在裏

舌上有毛

論相

心相

識貴人

武有之德禹別之州

文章有館閣氣

文章官樣

論富貴

集句

文公謝啓

復本姓謝啓

文莊詩

喜遷鸞詞

淮陰廟詩

老兒詩五五十韻

詩有障礙

吟詩見志

詩識

白孟二詩

牡丹不成一事

求食

三臺

驛券

繁臺

惠崇詩

立程嬰杵臼廟

臨終偈

張方平偈

訪荷澤像

裴晉公賦

范文正賦

王沂公賦

宮詞

類說目錄卷之四終

類說卷之四

宋溫陵曾慥編

新野馬之騏駼

明內黃司迺疆

山陽岳鍾秀訂正

西京雜記

綈几

漢制天子玉几冬加綈錦謂之綈几以象牙

為火籠以酒為書滴以玉為研皆取其不冰

夏設羽扇又設繒扇

常滿燈

長安巧工丁緩為常滿燈七龍五鳳雜以芙
蕖又作被中香爐機環轉運四周而爐體常
平又作七輪大扇一人運之滿堂寒顫
七夕穿針

漢宮七夕穿針皆會于開襟樓針皆七孔
九枝燈

秦咸陽有青玉九枝燈下有蟠龍燃則鱗甲
皆動項羽入關取之

珠襦玉匣

漢制諸陵皆珠襦玉匣形如鎧甲連以金縷
武帝匣上仍刻蛟龍

菊酒

漢俗九日佩茱萸房餌蓬餌飲菊酒其法以
菊雜黍米釀酒封室中至來歲重陽日開
飲耐

漢制宗廟八月飲耐用九醞酒
連枝草

樂遊苑自生玫瑰樹樹下多苜蓿一名懷風

又曰光風風在其間常蕭蕭然日照其花光采茂陵人謂之連枝草

遠方異果

瑰栗文杏緇核桃青房李皆遠方異果植之

上林

紫泥璽室

漢中書以武都紫泥為璽室皆綠綈其上

寶跗

進御筆管以錯寶跗間以璧玉翠羽之飾

金彊環

戚夫人善為翹袖折腰之舞歌出塞入塞即歸之曲又以百鍊金為彊環照見指骨上惡之以賜侍兒鳴玉耀玉等

吉光裘

武帝時西域獻吉光裘入水不濡異國獻短人東方朔問曰巨靈如何叛阿母今健否

金屋貯阿嬌

武帝為太子方數歲陳長主欲以女配帝曰

阿嬌好否帝曰若得阿嬌當以金屋貯之王
喜卽以配帝阿嬌陳后小字也

玉搔頭

武帝過李夫人賜玉簪搔頭又賜象牙簾

歲星不見十八年

東方朔臨終曰天下無知我者惟曆官大任
公知之帝召問之曰歲星不見十八年此夕
方出

吞文石

弘成子少有人授以文石大如燕卵吞之心
識開悟遂爲通儒後病吐石出以授弟子五
鹿充宗亦爲碩學

龍生九子

瓠子初決有蛟龍從九子自決口逆上濺波
流沫數里

相憐愛

漢宮七夕臨百子池以五色縷相羈謂之相
憐愛

竹下圍棋十

八月四日竹下圍棋十勝者終年有福不勝者有疾

九逸

文帝在代邸有良馬九匹號九逸如赤電鱗駒紫燕留綠螭驄之類

戲象

鞠道龍古有黃公術能制虎又能立興雲霧坐變山河後衰老飲酒亡度術不能神爲虎

所食故三輔間以爲戲象

東閣三館

公孫弘爲相開東閣分三館一日欽賢以待大賢次日翹材以待大才次日接士以待國士

寧逢惡賓無逢故人

公孫弘食故人高賀以脫粟飯覆以布被賀曰何用故人富貴爲脫粟布被我自有之弘內厨五鼎外膳一餽詐也弘曰寧逢惡賓無

逢故人

佳城

滕公往東都出門馬鳴蹶不進跑地成坎公
命掘之得石椁銘文古異叔孫通曰科斗書
也文曰佳城鬱鬱三千年見白日吁嗟滕公
居此室公歎曰天也某死其安此乎後葬其
地

蛟龍入懷

董仲舒夢蛟龍入懷乃作春秋繁露

字挾風霜

淮南王安著鴻烈云字中皆挾風霜

塵落帽飛

東方朔每嘯塵落帽飛

鷓鴣裘

司馬相如與文君久益貧以所著鷓鴣裘貫
酒

白頭吟

相如欲聘茂陵人女爲妾文君作白頭吟以

自絕相如乃止

作美人賦

文君眉色不加黛飾如望遠山臉際常若芙蓉肌膚如脂長卿素有消渴疾作美人賦以自刺卒以此疾死文君爲誄傳於世

夢黃衣翁

相如將獻賦未知所爲夢一黃衣翁曰可爲大人賦遂作之

枚馬文章

枚臯文敏時有累句長卿淹遲首尾溫麗故知疾行無善迹矣楊雄曰軍旅之際飛書馳檄用枚臯廊廟之中高文大冊用相如

此中多有

惠莊與朱雲論辨口吃不能對指其胸曰口雖不能劇談而此中多有

目矚得酒食

陸賈云目矚得酒食燈花得錢財鵲噪行人至蜘蛛集百事喜

類書
卷之四
算術

嵩真曹元理並喜算術真自算年七十三正月二十五日晡時死至二十四日晡時死其妻曰見真長下一算慮別有旨故不言果差一日死有遺恨矣陳廣漢貯米二困請元理計其數元理取食箸作數轉曰各若干開困校之東則數同西差一升有死鼠焉元理慚曰不知鼠之非米不如剝面皮矣它日元理請廣漢設食甚薄廣漢曰有倉卒客無倉卒

主人元理以七箸算曰俎上蒸豚厨中荔枝何不設廣漢大驚

乳母告急

武帝欲殺乳母告急於東方朔朔曰汝臨去但屢顧我當設奇激之乳母如所教朔在帝側曰汝宜速去帝今已大豈念汝乳哺時耶帝乃舍之

五侯鯖

五侯不相能賓客不得來任婁護傳會各得

其歡心競致奇膳護合以爲鯖世稱五侯鯖以爲奇味

金彈丸

韓嫣好挾彈以金爲丸日失數百當時語曰苦飢寒逐金丸

懷鈿提槩

楊雄懷鈿提槩從計吏訪四方語作方言

單鵠寡鳧

劉道疆善琴爲單鵠寡鳧之弄聽者悲不自

勝

夢白鳳

楊雄作太玄夢白鳳鳳集其上嘗云長卿賦不似從人間來其友曰何如其佳曰合纂組以成文列錦繡以成質遂爲合組之歌列錦之賦

蒲桃錦散花綾

霍光妻遺淳于行蒲桃錦散花綾五十疋綾出鉅鹿陳寶光家霍顯召入其第作之六十

日成一疋疋直萬錢又與珠排金錢爲起第
宅奴婢不可勝數衍曰吾爲爾成何功而報
我若是哉淳于衍女璧也光妻使以毒藥殺
許后者後皆誅滅連數千家
讀賦千首

或問楊雄爲賦雄曰讀賦千首乃能爲之
至誠金石爲開

李廣獵冥山見卧虎一矢而斃它日又見卧
虎視之矢飲羽進而視之乃石退而更射鏃
破斨折而石不傷葛洪以問楊雄曰至誠則

金石爲開洪曰昔有游東海者遇風漂船至
一孤洲植纜登洲煮食食未熟而舟沒洲乃
大魚吸波吐浪而去又陳縞入山采薪見墓
前石馬謂鹿也斧缺柯折石馬不傷兩者亦
至誠何金石所感偏乎雄無以應之

三雲殿

成帝設雲帳雲幄雲幕於甘泉紫殿世謂之

三雲殿

金衣菊裳

黃鵠下太液歌曰黃鵠飛兮下建章金爲衣
兮菊爲裳

凋胡

顧翽事母至孝母好食凋胡菰之有米也

幽王冢

幽王冢羨門甚大百餘戶枕籍唯一男子形
色如生

兩京雜記

病坊

祕書省監號宰相病坊少府號給舍病坊丞
大著號省郎病坊祕書郎及小著號察官病
坊

紗籠中人

李藩未第時有僧告曰公是紗籠中人藩問
其故曰凡宰相冥司必立其像以紗籠護之
後果至台輔

則天改新字

則天好改新字有言國中有或或者惑也乞

以武鎮之乃改作國復言武在口中與囚何異乃改作囚

冥間列榜

崔紹暴卒復生見冥間列榜備書人姓名將相列金榜其次列銀榜州縣小官並列長鐵榜

念珠廳

京兆士曹判案至一百八道謂之念珠廳

佛袍集

張田古謂同僚曰比買得僧孺集蓋謂牛僧孺也同僚曰某亦得佛袍集

秦京雜記

唱杖

開元格律應科責人惟守令許唱杖宅官不許

佛牙

京城五寺有佛牙右街總持寺左街安國寺崇聖寺薦福寺瑞聖寺次第設齋多至半月

至七八日皆遣使賜香都人大集
報羅使

進士放榜後至春闈前須有一人謝世名報
羅使言報大羅天也

繩楸之戲

寒食節內僕司車與諸軍使爲繩楸之戲合
車轍道兩頭打大楸張繩楸上高二尺許須
緊榜定駕車盤轉碾輪於繩上過不失者勝
落輪繩下者輸皆裝飾車牛賭物動以千計

內人科

咸陽舊牆內謂之內人科一作斜宮人死者葬
之長二三里風雨聞歌哭聲

音聲樹

都省後都堂門外大槐樹謂之音聲樹欲除
拜僕射此槐必有聲如歌曲

漢陂

漢陂以魚美得名

石橋上卜行馬

類說

卷之四

七

京兆尹新上老吏多於石橋上看行馬以十
其行事若上橋馬行速此尹必善若馬行澁
此尹必嚴惡甚驗

壓驚錢

李藹爲尹故事延英中謝閣門等諸司事例
共用三千緡以公使錢充藹至見在纜數緡
問吏何以取足吏請問捕賊官韓銖銖曰此
易耳請來日排衙拖拽銖於庭問西市波斯
客與漢客交雜久而乃釋之藹儒者不測其

由翌日如言責銖銖出蕃商二百許家各送
壓驚錢凡得數千緡乃以三千緡供庫贏餘
甚多

市語

長安市人語各不同有葫蘆語鑊子語紐語
練語三摺語通名市語

雞粟

大赦樹金雞雞口銜勝宣政衙鼓樓上鷄唱
六人至日同以索上鷄竿爭口中勝爭得者

月給俸三石謂之鷄粟

隨駕老鷄

行幸及內宴常有群鷄翔集謂之隨駕老鷄
後以弓矢彈去

番禺雜記

五羊

番禺二山名廣州昔有五仙騎羊而至遂名
五羊

火宅僧

僧之有室家謂之火宅僧

雷藏

村民鑿山爲穴以多品供雷冀雷享之名曰
雷藏

雷郎

民家女或爲神所依卽呼爲雷郎得子曰雷
子

看潮

番禺令初到三日謁潮神看幾神知在任幾

年其人善政卽洋洋而上徐徐而下其數多至七

歌堂

南人尚鄉歌每集一處共歌號歌堂

臘一伏二

嶺表所重之節臘一伏二冬三年四

水醫

殺牛祭鬼治病名毛藥每熱病作以水自首淋之名水醫

盪風

廣俗未見妻之父母所嫁女先飲一大杯謂之盪風

占卜

嶺表占卜甚多鼠卜箸卜牛卜骨卜田螺卜雞卵卜篾竹卜俗鬼故也

瘴母

或見物自空而下始如彈丸漸如車輪遂四散人中之卽病謂之瘴母

鬼市

海邊時有鬼市半夜而合鷄鳴而散人從之多得異物

諱藿

容州好食藿土人以為諱或云以蚯蚓為之以玉抵鵲

黎洞之人以香代爨荆山之下以玉抵鵲

鱈帆

鱈背上有骨如扇乘風而行名鱈帆其眾如

簾筏名鱈簾

鍊風

颶風將發有微風細雨先緩後急謂之鍊風又有石尤風亦颶之類

杏潮

早潮下晚潮上兩水相合謂之杏潮

潮田

以潮水溉田名潮田

天蛤

類說

卷之四

七

天蛤大如田蛤每大雪從空而下名天蛤
稻孫

稻經穫再生者名稻孫

合歡菜

葉如指甲每節四葉相對夜合晝開名合歡
菜

魚子草

溪湖中草上多魚子收草曝乾春水種之池
中須臾化成魚

競火樹

有草名競火樹言火不能燒多植以厭火又
曰火河言若河隔火

大業雜記

船脚

煬帝幸江都自洛口御龍舟高四十五尺闊
五十尺長二百尺分四重上一重有殿堂次
一重有一百六十房下二重安內侍及船脚
船脚卽水工之名

沉香堂

楊素東都起宅窮極奢巧中起沉香堂既成閉之三日後開則四壁皆洒新血腥氣觸入圖經

煬帝令杜寶修水室圖經十五卷以上巳日會群臣於曲水有神龜負八卦黃龍負圖黃魚雙躍白魚入舟呂望釣磻溪金人捧劍周處斬蛟許由洗耳莊周觀魚屈原沉湘凡七十二事皆刻木爲之

四時飲

謝諷造四時飲春以桃夏以酪秋以蓮實冬以枸杞

五香飲

仁壽間籌禪師造五色飲以扶桑葉爲青飲拔楔根爲赤飲酪漿爲白飲烏梅爲玄飲江筍爲黃飲荳音桂又以沉丁澤蘭甘松爲五香飲

芝草

類說

卷之四

七

東都生芝狀如樓闕又或如出字者
玉箱雜記

二龍

蔡邕崔寔號並鳳寔又與許受號二龍王仲
宣號泥下潛蛙

繡虎

曹植七步成章號繡虎

伏鸞隱鵠

鄧艾號伏鸞陸雲號隱鵠

擲玉於門

李盛作安南太守夢人擲玉於門盛曰門玉
閨字也必有榮閨果暴富貴

無愁酒

漢武作無愁酒飲之令人無憂

三榮三悴

晉楊都城北角有槐木一日之間三榮三悴

藏鈎

鈎弋夫人手拳而國色世作藏鈎戲因此

青箱雜記

魏野獻詩

王文公旦相真宗近二十年處士魏野獻詩
太平宰相年年出君在中書十四秋西祀東
封俱已畢可能來伴赤松遊歐陽公撰旦神
道碑銘曰國有大事事有大疑匪卜匪筮公
爲著龜真宗常倚旦決事故也

藥名詩

陳亞仕至太常少卿滑稽之雄也嘗著藥名

詩若風月前湖近軒窗半夏涼
碁怕臘寒呵子下衣嫌春暖
縮砂裁贈祈雨僧云無雨若
還過半夏和師喚作葫蘆巴
嘗曰布袍袖裏懷漫刺到處
遷延胡索人此句可贈游謁
窮措大亞與章郇公友善作
生查子陳情曰朝廷數擢賢
旋占凌霄路自是鬱陶人險
難無移處也知沒藥療孤寒
食檠何相誤大幅紙連粘甘
草歸田賦嘗作閨情生查子
三首曰相思意已深白紙書
難足字字若參商故要

檀郎讀分明記得約當歸遠志櫻桃熟何事
菊花時猶未回鄉曲二曰小院雨餘涼石竹
風生砌罷扇儘從容半夏紗幮睡起來閑坐
在北亭中滴盡真珠淚爲念壻辛勤去折蟾
宮桂三曰浪蕩去來來躑躅花頻換可惜石
榴裙蘭麝香銷半琵琶閑後理相思必撥朱
絃斷擬續斷來弦待這冤家看亞又自爲亞
字謎曰若教有口便啞且要無心爲惡中間
全沒肚腸外面強生稜角別有詩百餘首號

澄源集有歲旦詩云收寒歸地底俵老向人
間送歸化王宰詩云吏辭如賀日民送似迎
時郊遊詩云馬嘶曾到寺犬吠乍行村

下觀楊子小

曹琰郎中亦滑稽有僧以詩卷投琰首篇登
潤州甘露閣下觀楊子小琰曰早末狗兒肥
又一篇送僧云猿啼旅思淒琰曰犬吠張三
嫂

五更三七上八

劉擘龍圖亦滑稽常與劉筠飲茶問左右曰
湯滾也未左右皆曰已滾筠曰僉曰鯨哉擘
曰吾與點也又嘗與筠連騎趨朝筠馬病足
擘曰馬何故遲筠曰只爲五更三言點蹄也
擘應聲曰何不與他七上八意欲其下馬徒
行也

官職是國家底

陳執中作相有壻求差遣執中曰官職是國
家底非卧房籠篋中物壻安得有之竟不與

仁宗朝諫官累言執中不學亡術非宰相器
陛下眷意不替者得非以執中嘗與先朝乞
立陛下爲太子耶先帝止二子而周王已薨
立嗣非陛下而誰上曰非爲是但執中不欺朕耳

馮道詩

馮道詩雖淺近而造理有詩云窮達皆由命
何勞發嘆聲但知行好事莫要問前程冬去
冰須泮春來草自生請君觀此理天道甚分
明又云莫爲危時便愴神前程往往有期因

類言 卷之四
須知海岳歸明主未省乾坤陷吉人道德幾
時曾去世舟車何處不通津但教方寸無諸
惡狼虎叢中也立身

論馮道

世譏馮道事四朝十一帝不能死節考其所
言所行未嘗詭隨免於亂世蓋天幸耳石晉
之末與虜結釁無敢奉使者少主批令宰相
選人道批奏云臣道自去舉朝失色皆謂墮
於虎口道竟生還初郭威遣道迂湘陰道曰

不知此事由中否道平生不曾妄語莫遣道
爲妄語人及周世宗欲收河東自謂此行若
太山壓卵道曰不知陛下作得山否凡此皆
推誠委命未嘗顧避依阿也又虜主問萬姓
紛紛何人救得道發一言以對不啻活生靈
百萬俗人徒見道之迹不知道之心富文忠
公論道之爲人曰此孟子所謂大人也

上壽失容

張文定公齊賢相 太宗真宗以亮直重厚

稱晚娶薛氏婦 真宗不悅元會上壽齊賢
已微醺進止失容坐是謫安州其麻日仍復
酣觴杯觴歆傾冠弁蓋爲是也

張齊賢詩

張齊賢詩云慎言渾不畏忍事又何妨國法
須遵守人非真身拔無私仍克已直道更和
光此箇如端的天應降吉福處厚廣爲八篇
其一有云須信樞機法寧容駟馬追三緘事
可見兩舌業當知一二云堪嘆波羅密可憐歌

利王從心更從刃字意有消詳三云一毫如
有犯三尺不相饒四云在他誠所短於己有
何長五云公清多歛怨高亢易招危六云直
須和輔助和賴直交和恃直終多怙偏和又
少剛七云永馮几杖力更遺子孫謀八云舒
慘雖無定榮枯自有常

望火馬日遊神

皇祐嘉祐中未有謁禁士人多馳騫請托有
一人號望火馬又一人號日遊神蓋日有奔

類言
卷之四
競故也

香印

太祖廟諱語訛近香印故令賣香印者不敢
斥呼鳴囉而已 仁宗諱語訛近蒸今呼蒸
餅爲炊餅

避諱

錢武肅王諱鏐至今吳越間謂石榴爲金櫻
劉家爲金家 留任爲駐任楊行密據江
淮至今謂蜜爲蜂糖

父名岳不聽樂

劉溫叟父名岳終身不聽樂不游嵩華每赴
內宴聞鈞奏則涕泣移時曰若非君命則不
至於是此與李賀父名晉肅不舉進士頗相
類

諱取枉法贓

杜祁公衍常言父母之諱在我而已與人何
預公帥并門吏請家諱公曰下官無所諱唯
諱取枉法贓公後致政作詩曰雙鳧乘鴈常

深愧野馬黃羊亦過憂唐張說云吾肉非黃
羊必不畏喫血非野馬必不畏刺公詩蓋用
此

看尚書詩

真宗聽政之暇唯務觀書觀畢一書卽有篇
詠有御製看尚書詩三章春秋三章之類可
謂近代好文之主也

水津爲步

韓退之羅池廟碑言步有新船蓋嶺南謂水

津爲步故習步卽漁者施習處船步卽衆人
渡江處揚州瓜步洪州觀步閩中謂水涯爲
溪步

村市爲虛

嶺南謂村市爲虛椰子厚童區乙傳云之虛
所賣之又詩曰青箬裹鹽歸峒客綠荷包飯
趨虛人市之所在有人則滿無人則虛嶺南
村市滿少虛多曰虛不亦宜乎

疾市

頁說

卷之四

三

蜀有瘵市間旦集如瘵瘡之發其俗又以冷熱發歇爲市喻也

秀才可低處過

鄉人危敘應舉探省榜出門數步逢泥濘老嫗指示曰秀才可低處過危卽從之比看榜最末有名是歲果及第與撫言所載後來必銜得相類

斫頭留項在裏

劉相沆累舉不第天聖中將赴省試夢被人

斬其首心甚惡之有鄉人解曰狀元不到十
二郎做只得第二人公詰之答曰雖斫却頭
留項在裏蓋南音謂項爲沆果第二人及第
舌上有毛

馬亮知江寧府將代夢舌上生毛有僧解曰
舌上有毛剝不得當再任果然

論相

相形不如論心心相有三十六善夫人嘗言
意非求官自湏如此一也有剛有柔二也慕

善近君子三也有美食分人四也不近小人
五也常行陰德每事方便六也能治家七也
不厭人乞覓八也利人克己九也不逐惡貪
殺十也聞事不驚張十一也與人期不失信
十二也不易行改操十三也夜卧不便睡著
十四也馬上去不回顧十五也人不憎怒十
六也不文過飾非十七也作事周匝十八也
不忘人恩十九也有大量二十也不毀善害
惡二十一也濟急二十二也不助強欺弱二

十三也不忘故舊二十四也爲事衆人用之
二十五也不多言妄語二十六也得人物每
生慚愧二十七也語有叙二十八也當人語
次不先起二十九也常言善事三十也不嫌
惡衣惡食三十一也方員隨時三十二也行
善不倦三十三也知人飢渴勞苦三十四也
不念舊惡三十五也竭力救難三十六也三
十六善全老位極人臣壽考令終不全則禍
福相折具二十者刺史之位具十以上令長

類言 卷之四
之官具五者亦須大富

心相

諺曰有心無相相逐心生有相無心相隨心滅

識貴人

昔人謂官至三品不讀相書自識貴人以其閱多故也

武有之德禹別之州

龍圖劉燁未第時娶趙尚書長女早亡猶有二妹復欲妻之燁曰若是武有之德不敢爲姻如言禹別之州庶可從命蓋欲九姨議婚不欲七姨爲匹故也夫人曰諺曰薄餅從上揭劉郎才及第豈得便揀點人家女燁曰非敢有擇但七姨骨相寒薄非某之對遂娶九姨後生七子皆至大官七姨後適關生竟不第落泊寒餒劉氏養之終身

文章有館閣氣

夏英公謁盛文肅文肅曰子文章有館閣氣

異日必顯後如其言

文章官樣

文章有兩等山林草野之文其氣枯槁著書
立言者之所尚也朝廷臺閣之文其氣溫潤
演綸視草之所尚也王安國曰文章格調須
是官樣今樂藝亦有兩般教坊則婉媚風流
外道則粗野嘲啗村歌社舞抑又甚焉亦與
文章相類

論富貴

晏元獻覽李慶孫富貴曲云軸裝曲譜金書
字樹記花名玉篆碑公曰乞兒相未諳富貴
者公詩有云樓臺側畔楊花過簾幕中間燕
子飛梨花院落溶溶月柳絮池塘淡淡風公
曰窮兒家有此景致也無公不喜肉食尤嫌
肥羶每愛韋蘓州詩曰全沒些脂膩氣

集句

晏元獻集句若無可奈何花落去未曾相識
燕歸來靜尋啄木藏身處閑見遊絲到地時

樓臺冷落收燈夜門巷蕭條掃雪天已定復
搖春水色似紅如白海棠花之類宋莒公曰
此數聯後之詩人無復措詞

文公謝啓

楊文公母病謁告逮歸與弟倚居踰年不調
有謝啓云介推母子願歸綿上之田伯夷弟
兄甘受首陽之餓後除知汝州言事者攻擊
不已公又有啓云已擠溝壑猶下石而弗休
方困蒺藜尚關弓而相射

復本姓謝啓

范文正公幼孤隨母適朱氏因冒朱姓後復
本姓謝啓曰志在投秦入境遂稱於張祿名
非霸越乘舟乃効於陶朱以范睢范蠡嘗改
姓故也僞蜀范禹偁亦嘗冒張姓謝啓云昔
年上第誤標張祿之名今日故園復作范睢
之裔然不若文正之精切

文莊詩

夏文莊公竦舉制科廷對罷遇揚徽之見其

年少曰願丐賢良一篇以上他日之志公詩
曰殿上袞衣明日月硯中旗影動龍蛇縱橫
禮樂三千字獨對丹墀日未斜楊嘆服曰真
將相之器也

喜遷鶯詞

景德中夏文莊初授館職時方早秋上在拱
宸殿按舞命中使索新詞公立進喜遷鶯曰
霞散綺月沉鈎簾卷未央樓夜涼河漢截天
流宮闕鎖新秋瑤堦犯英宗諱金莖露鳳髓香和

雲霧三千珠翠擁宸游水殿按梁州上大悅

淮陰廟詩

淮陰侯廟題詩惟錢昆最爲絕唱曰築壇拜
日恩雖厚躡足封時慮已深隆準早知同鳥
喙將軍應有五湖心

老兒詩五十韻

唐路德延有孩兒詩五十韻張師錫侍郎次
韻爲老兒詩曰鬢髮盡皤然眉分白雪鮮週
退延客託偃佞抱孫恸無病常供粥非寒亦

衣絲假溫衾擁背借力杖楮肩貌比三峯客
 年過四皓仙喚方離枕上扶始到門前每愛
 烹山茗常嫌釘石蓮耳聾如塞繖眼暗似籠
 烟宴坐羸凭几乘騎困鞞鞭頭搖女軛旋厖
 動若批牽骨冷愁離少牙疼性流泉形骸將
 就木囊橐尚貪錢膠鬲靴助綴粗長冷涕懸
 披裘服慄繫濯手神慌拉擡舉衣頻換扶持
 藥屢煎坐多茵易破行少履難穿喜如裁初
 布疋妻買粉卸房教深下幕床遣厚鋪氈琴

聽伶三樂圖張笑七賢看嫌經字小敲喜磬
 聲圓食罷羹流一作沾 紗杯餘酒帶涎樂來

須遣罷醫到久相延裏帽縱橫拈梳頭取次
 纏長吁思往事多感聽哀絃氣汗膠還重屈
 求藥僧來忽問禱炒芽慧管居一作 曠簷核
 怒僕空 耶喚值誤捥拳心驚嫌蹴踞脚軟
 怕鞦韆局縮同寒狖堆豚似飽鳶觀瞻多日
 眩舉動則頭旋女嫁求紅燭男婚乞彩霞已

聞頽几杖寧更佩韋絃
賓客身非與兒孫事
已爲養和屏作伴
如意拂相連久棄登山屐
惟存負郭凡呻吟朝不樂
展轉夜無恥呼稚
臨床時看書就枕邊
疑懷則才虛言必
躡束帛非無分安車信有緣
伏生甘坐末絳
老讓行先抑急
紫風衣昏沉欲
雨天雞皮塵
放漬齟齬食
糠塹每憶居郎署
常思釣渭川
喜逢迎佛會羞赴賞
花筵逕狹容移榼
塔危
索荒塹好生焚鳥
紉惡殺折魚船
旣感桑榆

日常嗟蒲柳年長思當弱冠悔不贖狂顛
詩有障礙

江南李觀詩云人言落日是天涯望極天涯
不見家已恨碧山相掩映碧山還被暮雲遮
識者曰此詩意有重重障礙李君恐時命不
偶後如其言

吟詩見志

宋莒公庠知許州開西湖詩曰鑿開魚鳥忘
情地展盡江湖極目天識者知其位極一品

矣孟郊下第詩曰兩度長安陌空將泪見花
及第詩曰一日看盡長安花進取得失常事
下第隕穫至於下泪登科則志氣充溢一日
之間花卽看盡何其速也竟死於溧陽尉

詩讖

寇萊公少作詩曰去海止十里過山應萬重
及雷州問州去海幾里吏云十里則南遷已
預讖矣張乖崖詠晚年典淮陽郡詩曰方信
承平無一事淮陽閑殺老尚書後一年捐館

亦詩讖也蘇公初題金山寺云僧依玉鑑光
中任人踏鼈 背上行讖者云榮入玉堂之
兆其後止於內相亦詩讖也

白孟二詩

白居易詩曰無事日月長不羈天地闊此曠
達者之詞也孟郊詩曰出門卽有碍誰謂天
地寬此褊隘者之詞也天地又何嘗碍郊郊
自碍耳

牡丹不成一事

王文康公詩曰棗花至小能成實桑葉雖柔
解吐絲堪啖牡丹如斗大不成一事又空枝
亦重厚者之詞也

求食

春秋左氏傳稱三叛人以土地出求食而已
賤而書名以其無廉恥之至也今娼家謂之
求食蓋本乎此

三臺

蘓有姑蘓臺故號蘓臺相有銅雀臺故號相

臺滑有測景臺故號滑臺

驛券

唐以前館驛並給傳往來開元中務從簡便
方給紙券驛給券自此始

繁臺

天清寺繁臺本梁王鼓吹臺梁高祖改爲講
武臺後繁氏居其側里人乃呼爲繁臺

惠崇詩

楚僧惠崇工詩書楊氏別墅云河分崗勢斷

春入燒痕青塞上云河水堅度馬塞雪密藏
鵬宿東林寺云鳥歸山墮雪僧定石沉雲上
楊翰林云露寒金掌重天近玉繩低柳氏書
齋云著書驚日短彈劍惜春深秋夕露下牛
羊靜河明桑柘空舟行云林斷城隍出江分
島嶼迴遊隱靜寺云空潭聞鹿飲踈樹見僧
行送錢供奉云劍佩明山雪旌旗濕海雲濠
梁夜泊云夜閑潮動舸秋迴月臨城早行云
繁霜衣上積殘月馬前低懷長公云秋近草

重亂夜遙霜月低夏夜云扇聲猶泛暑井氣
忽生秋賀劉舍人云日躔黃道迴春入紫微
深陝西道中云關河雙鬢白風雪一燈青

立程嬰杵臼廟

神宗朝皇嗣屢闕吳處厚上書乞立程嬰公
孫杵臼廟庶幾鬼不爲厲國統有繼上勅河
東方尋遺跡乃得其家於絳州詔封嬰杵臼
並爲侯因命立廟處厚上書其畧云史記世
家考趙氏興廢本末惟程嬰公孫杵臼盡死

不顧保全趙氏孤兒乃知國家傳祚至今皆
二人之力也

臨終偈

楊文公王相隨二公皆達性理文公臨終偈
曰漚生復漚滅二法本來齊要識真歸處趙
州東院西王相偈曰盡堂燈已滅彈指向誰
說去住本尋常春風掃殘雪是夕薨凌晨大
雪

張方平偈

張尚書方平尤達性理有人問祖師西來意
張作偈曰自從無始千千劫萬法本來無一
法祖師來意我不知一夜西風掃黃葉

訪荷澤像

富鄭公遺吳處厚書託訪荷澤諸禪師畫像
吳作偈曰是身如泡幻盡非真實相况茲紙
上影妄外更生妄到岸不須船無風休起浪
唯當清靜觀妙法了無象公答曰執相誠非
破相亦妄不執不破是名實相

裴晉公賦

詩見人志賦亦可見馬晉公作鑄劍戟爲農器賦云我皇帝嗣位三十載寰海鏡清方隅砥平駮域中盡歸力穡示天下弗復用兵則平淮西一天下已見於此賦矣

范文正賦

范文正公作金在鎔賦云如令區別妍媸願爲軒鑑若使削平禍亂請就干將則公負將相器業文武全材已見於此賦矣公爲水車

賦云方今聖人在上五日一風十日一雨則斯車也吾其不取意謂水車唯施於旱不旱則無所施公在寶元康定間邊鄙有事驟加進擢晏靜則置而不用亦與水車何異

王沂公賦

王沂公有物混成賦云不縮不盈賦象寧窮於廣狹匪彫匪斲流形罔滯於盈虛則宰相陶鈞之意可見矣又云得我之小者散而爲草木得我之大者聚而爲山川則擇任群材

使小大各得其所又可見矣

宮詞

王公隨有宮詞云一聲啼鳥禁門靜滿地落花春日長又野步云桑斧科春色漁歌唱夕陽皆應舉時行所作

類說卷之四終

類說目錄卷之五

燕北雜記

壓襖法

木兔

請蕭姓者

埋狗

木葉山

旋風

種田

蕭姓請耶律

艾衣

三節

打圍斗射虎

莫黑山

戎裝飲

治盜

播鼓

舍利

行軍

午日大喊

十里鼻

洞冥記

徹德宜封

九色鳳雛

負局先生

却睡草

神馬

蛟人泣珠

猗蘭殿

王母降

玉枝

龜甲屏風

刀花赤鵲

桂柱

碧草

唱迴風曲

龍叫池

翻雞菱

躡空草

蟹膠

懷夢草

騰光臺

含烟舟

玉璃

玉燕釵

龜二千年一出頭

滑稽兒

影蛾池

十洲記

不死草

集絃膠

割玉如泥

碧海

火浣布

仙槿

蓬丘

十二玉樓

崑崙宮

廣寒宮

青雲千里

神丸

武帝四多

風生獸

靈膠

扶桑

風山

拾遺記

青虹

丹渠霞漿

昆臺

召百辟受教

甯封食飛魚

孤桑

鐘磬聲振百里

夢吞日生子

丹石

寶露

三壺

青鸛

貫月担

鳥吐五氣色

河精

黃龍玄龜

玉蘭

傳說夢乘雲

蜂舟

泥籬國來朝

鳳鷄

綠囊中丸散

師延奏曲

比翼鳥

八駿

玉帳高會

仁鳥

水精之子

黃髮五老

寶井

玄天女

肘間金壺

指端出浮圖

螺舟

子午臺

趙高懷中青丸

紫琉璃帳

雲雷宮

崆峒靈瓜

瓊厨金冗

兩舌重音

夜舒荷

太一之精

舌耕

經神經苑

行尸走肉

書倉

針神

辟寒金

機絕針絕絲絕

嚙語通周易

九鼎

招涼珠

白獺髓

百濯香

青衣撲火

九醞酒

頻斯國

側理紙

房老

瑤臺十二

芳塵

金霧

頗稜

怨碑

帝幸枕

泥封

滯泉

龍駒島

蓬萊山

不周之粟

水蚕

金堂

玉錢

碧霜

玉人

夜明苔

鑄兎腎為二劍

月鏡

神龜

八鴻

璿宮

冥祥記

神實不盡

壞經為衣

阿練

女記前生刀子

齊諧記

啖膾鱉

針腫

白獺

類說目錄卷之五

類說卷之五

宋温陵曾慥編

明新野馬之騏參閱
山陽岳鍾秀訂正

燕北雜記

壓襪法

每年正月一日以糯米炊飢用白羊髓和丸
為團如拳大行宮寢帳內各散四十九丸為

壓襪法番中呼此謂之妳担離妳是丁担

蕭姓請耶律

二月一日番中蕭姓者並請耶律姓者於本
家筵席番呼此節為瞎里瞎里是請討是

木兔

三月三日以木雕為兔分兩朋走馬射之先
中者勝其負朋下馬跪奏勝朋人酒勝朋於
馬上接殘飲之番呼此節為淘裏化淘裏是
兔化是

艾衣

五月五日午時採艾摘葉與綿相和絮衣七

事戎主著之番漢臣僚各賜艾衣三事渤海

厨子進艾膏番呼此節為討賽離

請蕭姓者

六月十八日耶律姓却請蕭姓者亦名瞎里

討

三節

七月十三日至十五日迎節送節哭節大番

呼為賽離捨賽離是月捨是子

埋狗

八月八日殺白犬於寢帳前七步埋其頭露
背後七日移寢帳於埋狗頭地上呼此節為
担褐妳 担褐是狗妳是頭

打圃斗射虎

九月九日打圃斗射虎少者輸重九一筵席
射罷於地高處卓帳飲菊花酒出兔肝切生
以鹿舌醬拌食之呼此節為一十賽 一十是
九賽是

木葉山

十月將小紙衣甲像生鎗刀器械望木葉山
寄庫呼為戴粹 戴是燒辣是甲

奠黑山

冬至日殺白羊白馬白鴈出生血和酒望黑
山奠神言契丹死魂為黑山神管係

旋風

契丹見旋風合眼用鞭望空打四十九下口
道坤不刻七聲

戎裝飲

膾月戎裝飲酒呼為抄離時抄離是戰時是

種田

番呼種田為提烈

治盜

正月十三日放契丹做賊三日如盜及十貫

以上依法行遣呼為鶻呂時鶻呂是偷時是

搥鼓

戎王別有鼓十六面發更時搥動至二點住

三更再搥呼為倍其不離鼓是驚鬼

舍利

契丹富豪民要裹頭巾者納牛駝七十頭馬

百疋并給契丹名目謂之舍利

行軍

契丹行軍不擇日用艾和馬糞於白羊琵琶

骨上炙炙破便出行不破即不出

午日大喊

番兵每遇午日如不逢兵亦須排陣望西大

喊七聲言午是番家大王之日

十里鼻

北界漢兒方爲契丹凌辱罵作十里鼻十里鼻奴婢也

洞冥記

徹德宜封

武帝坐溫室小殿有童女玉色服青衣緣瑣窗而入跪於帝前曰后土之尊使臣送瑤符於陛下符文曰徹德宜封帝乃議封禪之事九色鳳鷄

東方朔游房林之野獲九色鳳鷄

負局先生

李袞負五嶽真形圖而至號負局先生

却睡草

善語國人飲丹露云日初出有露如朱又有草食之不睡號却睡草

神馬

東方朔游吉雲之地得神馬來以遶日三匝朝出暮歸

蛟人泣珠

跋勒國人嘗有蛟人宿其舍既去泣別所墮
泪皆成珠

猗蘭殿

猗蘭殿漢武帝所生之殿

王母降

武帝時王母降聞其歌不見人聲圍匝梁棟
間

玉枝

東方朔得西那國玉枝以進武帝賜近臣年
高者云病則枝汗死則折老聃得之七百年
不汗偃佺得之三千年不折

龜甲屏風

武帝起神明臺臺上設金牀象席雜玉爲龜
甲屏風

刀化赤鵲

武帝賜東方朔刀後化赤鵲入雲去

桂柱

甘泉宮有凌波殿以桂爲柱風來自香
碧草

瑤琨山有碧草草實如菱以釀酒一飲三旬
不醒

唱迴風曲

漢宮人麗娟善歌體弱殆不勝衣常居瑠璃
帳帶琥珀佩恐隨風輕舉常唱迴風曲庭葉
翻落如秋

龍叫池

漢宮龍叫池有掇月舟太一池有連錢荇

翻雞菱

玄都觀有翠水水中有菱狀如飛鷄謂之翻
鷄菱又有鴨丹毛而輕登芙蓉藻啖食朝露號
升藻鴨

躡空草

鳥奔國有草如芥葉食之能行空中號躡空
草

蟹膠

善化國貢蟹長九尺有百足四殼煮其殼為蟹膠勝於鳳啄

懷夢草

鍾火山有香草武帝思李夫人東方朔獻帝懷之即夢見名懷夢草

騰光臺

建元中起騰光臺臺上設樂有懸黎之磬吹霜條之篴唱來雲依日之曲

含烟舟

漢宮含烟舟以木蘭文杏為櫓

玉螭

成帝微行見一玉螭遊於路

玉燕釵

趙后玉釵化為白燕飛去後人因作釵名玉燕釵

龜二千年一出頭

黃安者為代郡卒服朱砂舉體皆赤嘗坐一龜廣長三尺曰此龜伏羲初造網罟得之性

畏日月每二千年一出頭我坐此見五出頭矣

滑稽兒

帝呼東方朔爲滑稽兒

影娥池

望鵲臺有池廣千尺帝欲使仙人乘舟弄月

影因名影娥池

十洲記

十洲者祖洲瀛洲玄洲炎洲長洲元洲流洲

生洲鳳麟洲聚窟洲

不死草

祖洲有不死草出瓊田又名養神芝人已死三日者以草覆之卽活採服之長生

集絃膠

鳳麟洲以鱗角作膠名集絃膠能屬連斷絃又名續絃膠

割玉如泥

流洲以昆吾石作礪冶鐵作劍割玉如削泥

碧海

扶桑東有碧海水色深碧

火浣布

炎洲有火林山山有火鼠鼠毛爲火浣布有垢燒卽除

仙槩

扶桑島有木如桑實如槩仙人以爲珍果九十年一實

蓬丘

蓬萊山一名蓬丘別有圓海黑色無風而洪波百丈不可得往

十二玉樓

崑崙山積金爲城名天墉城面方千里上有十二玉樓

崑崙宮

崑崙山有三角一角正北名閬風巔一角正西名玄圃臺一角正東名崑崙宮

廣寒宮

冬至後月養魄於廣寒宮

青雲千谷

漢武時西域遠夷來貢云嘗占東風入律十
旬不休青雲千谷連月不散意中國有好道
之君故搜奇蘊以獻

神丸

月支國獻武帝香四兩大如雀卵累如桑椹
使者曰此更生之神丸

武帝四多

月支使者見武帝退而語人曰帝有四多目
多顧則貪忍口多言則犯難身多動則淫賊
心多飾則奢侈未有用此能成天下之治者
也

風生獸

炎洲有風生獸似豹青色大如狸在火中不
焚其毛不焦斫刺不入以鐵椎椎其頭乃死
以口向風便活石上菖蒲塞其耳鼻則死取
其腦和菊服之長生

靈膠

日西國王貢靈膠四兩吉光裘二領裘入水
不沉入火不焦

扶桑

扶桑地方萬里多生林木葉如桑樹長者數
千丈兩兩同根偶生故名扶桑

風山

玄洲上有風山聲響如雷

拾遺記

青虹

春皇者伏羲之別號居華胥之州初神母游
洲上有青虹繞神母卽娠歷十二年生伏羲
丹渠霞漿

神農時陸地生丹渠駢生如車蓋又有流雲
洒液名爲霞漿

昆臺

黃帝厭世于昆臺乃鼎湖峻極之處
召百辟受教

黃帝召百辟受德教者先列珪玉於蘭臺燃
沉榆之香

審封食飛魚

黃帝使風后負書常伯荷劍日游洹流夕歸
陰浦萬里一息洹流有石渠一莖百葉千年
一花其地一名沙瀾沙湧起成波瀾也中多
神龍魚鱉皆能飛翔仙人審封食飛魚而死
二百年更生故審先生游沙海頌云青藻的
樂千載舒百齡暫死餌飛魚

孤桑

少昊曰皇娥處璇宮夜織或乘桴游窮桑之
浦有神童稱白帝之子即太白之精與之燕
戲窮桑者西海之濱有孤桑直上千尋萬歲
一實食之後天而老

鍾磬聲振百里

顓頊有浮金之鍾沉明之磬羽毛拂之則聲
振百里又奏含英之樂

夢吞日生子

類言 卷之五
帝嚳之妃鄒屠氏之女行不踐地常履風雲
夢吞日則生子

丹石

丹丘之野多鬼血化爲丹石則碼礪也丹丘
千年一燒黃河千年一清

寶露

黃帝時瑪瑙甕堯時猶存甘露在其中盈而
不竭謂之寶露頒賜群臣至舜時露漸減時
淳則露滿時澆則露竭

三壺

海中三山曰三壺方壺則方丈也蓬壺則蓬
萊也瀛壺則瀛洲也 形如壺

青鸛

羽山之北有鳥曰青鸛聲如鐘磬世語曰青
鸛鳴時太平

貫月查

堯時有巨查浮西海上有光如月查浮四海
十二年一周天周而復始名貫月查亦曰桂

星查

鳥吐五色氣

舜葬蒼梧有鳥吐五色氣名曰憑霄啣土成墳積珠成壘

河精

鯨治水九載無績自沉羽淵化爲玄魚

黃龍玄龜

禹盡力溝洫黃龍曳尾於前玄龜負青泥於後

玉簡

禹游龍門八神探玉簡授之長一尺二寸使量度天地禹執簡平定水土

傳說夢乘雲

傳說賃爲赭衣春巖夢乘雲繞日而行筮得利建侯封帝聘之

蜂舟

武王伐紂有大蜂如丹鳥飛集王舟因以繪旗名舟曰蜂舟

泥籬國來朝

成王時泥籬國來朝其人自發其國常行雲
中下聞雷霆或入潛穴波瀾在上視日月以
知方國計寒暑以知年月

鳳鷄

旃塗國獻鳳鷄載以瑤車駕以赤象飲瓊漿
飼雲實成王崩飛去

綠囊中丸散

昭王坐祗明之臺夢白雲起有羽衣人指畫

王心應手卽裂曰先欲易王之心乃出方寸
綠囊中有續脉明丸補血精散王貯以玉缶
緘以金繩王以塗足則飛天萬里如遊咫尺
師延奏曲

師延樂人也拊一絃琴則地祗皆升吹玉律
則天神俱降當軒轅時已數百歲聽樂聲審
國興亡紂欲殺之師延奏清商流徵滌角之
音紂曰淳古遠樂非予可聽更奏迷魂淫魄
之曲乃得免禍

比翼鳥

燃丘國獻比翼鳥以玉爲樊其使者經百餘國方至京師

八駿

穆王巡行天下馭八龍之駿一名絕地足不踐土二名翻羽行越飛禽三名奔霄夜行萬里四名超影逐日而行五名踰輝毛色炳耀六名超光一形十影七名騰霧乘雲而奔八名挾翼身有翅

玉帳高會

穆王集方士春霄宮設常生之燈鳳腦之燈璠膏之燈又有水荷出水壑中西王母乘鳳輦而來玉帳高會進洞淵紅蘼嚙州甜雪崑崙流素蓮陰岐黑棗萬歲水桃千年碧藕素蓮一房百子黑棗其樹百尋實長二尺百年一熟

仁鳥

晉文公焚林求介子推有白鷗遶烟而噪呼

曰仁鳥俗謂烏白臆者爲慈鳥則其類也
水精之子

孔子生之夜有三蒼龍自天而下有二神女
擎香露於空中以沐浴徵在天帝下奏鈞天
之樂有五老列於庭則五星之精也先是有
麟吐玉書於闕里人家云水精之子系衰周
而素王故二龍遶室五星降庭徵在以繡紱
繫麟角及夫子將終抱麟解紱而泣

黃髮五老

老聃居反景日室之山有黃髮五老卽五方
之精也或乘鴻鶴或衣羽毛耳出於頂瞳子
皆方握青筠之杖與聃共談天地之數

寶井

范蠡收四方難得之貨或藏之井塹謂之寶
井麗色溢於閨房謂之遊宮

玄天女

燕天王時廣延國獻善舞二人一名提漢次名
或行無移影或積年不飢其舞一曰縈塵次日曰

集羽王好神仙玄天之女託形作此二人

肘間金壺

浮提國獻善書二人出肘間金壺中有汁如
漆洒地皆篆隸佐老子作道德經凡數萬言
老子刪除之留五千言

指端出浮圖

休齊國道人尸羅指端出浮圖十層高二尺
人長五六分執幢蓋遶塔而行

螺舟

秦始皇好仙有宛渠之民乘螺舟而至舟形
似螺沉行海底水不浸人其國人長十丈語
及天地初開之時了如目睹

子午臺

始皇起雲明臺窮四方之珍木搜天下之巧
工子時起工午時已畢秦人謂之子午臺

趙高懷中青丸

秦王子嬰懸趙高於井口七日不死以鑊湯
煮七日不沸乃戮之獄吏曰高初囚時懷中

有一青丸大如雀卵方士云高先世受韓終丹法冬卧堅冰夏卧爐上不覺寒熱高死一青雀從屍中入雲九轉之驗也

紫琉璃帳

黃偃以玉精為盤貯冰於前設紫琉璃帳火齊屏風列靈麻之燭

雲雷宮

漢成帝造飛行殿方一丈其行疾若風雷號雲雷宮

崆峒靈瓜

漢明帝時焯煌進異瓜云崆峒靈瓜四劫一實

瓊樹金穴

光武皇后弟鄧况家工作之聲不絕人謂郭氏之室不雨而雷東京謂况家為瓊厨金穴兩舌重音

西方有因霄國國人皆善嘯丈夫嘯聞百里婦人五十里如笙竽之音人舌尖處倒向喉

內亦曰兩舌重音呂氏春秋云反舌殊鄉之國是也

夜舒荷

靈帝起裸遊館千間渠水遶砌蓮大如蓋長一丈荷夜舒晝卷名夜舒荷宮人靚粧解上衣著內服或共裸浴西域貢茵墀香煑湯餘汁入渠號流香渠

太一之精

劉向校書天祿閣夜有老人著黃衣植青藜

杖授向五行洪範云我是太一之精天帝聞金卯之子有博學者下而觀焉出懷中玉牒有天文地圖之書

舌耕

賈逵通經門徒來學不遠萬里獻粟盈倉或云逵非力耕所謂舌耕

經神經苑

鄭康成爲經神任末爲經苑何休爲學海行尸走肉

任末曰人而好學雖死若存不學者雖存行尸走肉耳

書倉

曹曾積石爲倉以藏書名曹氏書倉

針神

魏文帝美人薛靈雲容貌絕世妙於針工能暗中裁染號針神

辟寒金

魏明帝時昆明國貢嗽金鳥飼以真珠飲以

龜腦常吐金屑如粟鳥性畏寒處之小屋水精爲戶內外通光名辟寒臺宮人以鳥吐金飾釵謂之辟寒金

機絕針絕絲絕

吳王趙夫人能於指間織錦號機絕於方寸帛上繡五嶽河海號針絕以神膠續髮織裁爲幔仍一髮析爲數縷號絲絕

嚙語通周易

呂蒙夢誦周易俄驚曰向夢見伏羲周公文

王論世祚興亡之事日月貞明之道衆云呂
蒙嚙語通周易

嚙魚計反睡語也

九鼎

禹鑄九鼎五者以應陽數四者以象陰法以
雌金爲陰鼎雄金爲陽鼎鼎中常滿以占休
咎夏桀之亡鼎水皆沸

招涼珠

黑蚌珠能却暑燕昭王暑月懷之號消暑招
涼珠

白獺髓

孫和月下舞水精如意悞傷鄧夫人頰大鑿
曰得白獺髓雜玉與琥珀屑當滅痕富春漁
人云此物知人欲取則入石洞伺其祭魚有
闔死者穴中有枯骨可合玉春爲粉歛瘡上
和乃合此膏琥珀太多及差有赤點更益其
妍諸嬖人更以丹脂點頰以要寵

百濯香

孫亮爲四姬造香百浣不歇號百濯香

青衣撲火

糜竺家有伏屍夜聞涕泣竺命爲棺以青布衣置塚中後見一婦人曰君有火厄今以青蘆杖報君竺財貨如山大珠如卵謂之寶庭後火起見數十青衣童子撲火火滅童子云多聚鶴鳥襪火以鶴能畜水於巢上

九醞酒

張華爲九醞酒若醉不叫咲搖動則消爛腸胃名爛腸酒

頻斯國

魏有頻斯國人來朝五色玉爲衣賚金壺壺中有漿如脂嘗一滴則壽千歲其國有大石可容萬人上刻三皇像天皇十二頭地皇十一頭人皇九頭皆龍身國人不食五穀日中無影飲桂漿羽毛爲衣

側理紙

張華進博物志賜于闐青鐵硯遼西麟角筆南越側理紙南人以苔爲紙其紙縱橫斜側

類記 卷之五
因以爲名後人言陟里

房老

石季倫妾名翔風妙別玉聲善觀金色聲容
相類者十人服飾一等屑沉香爲塵布象席
上踐之無跡者賜真珠百琲有跡者節其飲
食閨中戲曰爾非瘦骨輕軀安得百琲真珠
及翔風色衰退爲房老

瑤臺十二

崑崙山上有瑤臺十二各廣千步皆五色玉

第九層有芝田蕙圃

芳塵

石虎起四十丈樓結珠爲簾垂五色玉佩雜
寶異香爲屑風作則揚之名芳塵塵甚以酒
洒之名粘雨又爲四時浴室砥砮爲堤琥珀
爲杓池中以百雜香囊漬水中浴罷洩水宮
外名溫香渠

金霧

岱輿山有平沙千里色如金風起沙名金霧

又名金塵有獸名嗽月有光如月有瑤草香
花葉俱香

頗稜

西國菜名頗稜因僧携子入中國訛為波稜

怨碑

秦始皇作墓并匠者閉之匠人墓中刻石皆

怨詞後經發墓人號怨碑

帝辛枕

漢誅梁冀得一玉虎頭枕領下篆云帝辛之

枕與妲已同枕之

泥封

元封中浮忻國貢蘭金之泥常以此泥封函

匣及宮門鬼魅不敢干衛青張騫之徒皆受

金泥之璽封

滯泉

日南有泉甘軟男女飲之則滯號滯泉

龍駒島

東海有島名龍駒川穆王養八駿處有草名

龍芻

蓬萊山

蓬萊山一名防丘一名雲來瀛洲一名魂洲
一名環洲懸火精為日黑玉為烏水精為月
青瑤為蟾兔

不周之粟

員嶠山多大鵲啣不周之粟粟穗高三丈食
之經月不飢呂氏春秋亦云粟之美者有不
周之粟

冰蚕

員嶠山有冰蚕長七寸有鱗覆以雪霜作齧
長一尺織為文錦入水不濡

金堂

洞庭山浮水上其下金堂數百間龍女居之
金石絲竹之聲徹於山頂

玉錢

晉因墀國獻玉錢其文曰天壽永昌

碧霜

頁說

卷之五

三

廣廷國霜色紺碧

玉人

蜀先主以玉人立甘后側玩之宮人妬后亦
妬玉人

夜明苔

晉太始中外國獻金苔有宮人得幸者賜之
照耀滿室名夜明苔

鑄兔腎為二劍

干將鑄鄒昆吾山有獸如兔食銅鐵膽腎皆

如鐵吳國武庫中兵刃俱盡而封署如故得
雙兔殺之有鐵如膽腎方知兵刃為兔所食
乃鑄腎為二劍雄為干將雌為鑄鄒

月鏡

周靈王時外國貢石鏡其白如月照人則寒
名月鏡

神龜

崑崙山有神龜萬歲則升木能言

八鴻

八方曰八鴻鴻大也

璿宮

后宮曰璿宮

冥祥記

神實不盡

宋王灌之不信佛法嘗謂身神俱滅寧有三世耶後得病氣絕復蘇謂荷道力或曰明府生平置論不爾今何見而異之灌之歛眉答云神實不盡佛教不得不信語卒而終

壞經爲衣

宋尼智通年少信道不篤師死罷嫁魏郡梁甫生一男家貧無以爲衣尼有法華等經悉練之以衣其兒一年得病竟體壞爛狀若火瘡有細白虫日出升餘晝夜號叫聞空中語云壞經爲衣得此報也旬餘而死

阿練

晉中書令王珉有一胡沙門每瞻珉丰采曰若我復生得與此人作子願亦足矣頃之病

卒珉生一子始能言便解外國語及絕國珠
具生所未見卽識名曰咸爲沙門先身故珉
字之曰阿練

女記前生刀子

向靖有女數歲而亡始病時弄小刀子母奪
取不與傷母手又後產生一女年四歲曰前
時刀子何在母曰無也女曰昔爭刀子故傷
母手云何無也靖覓數刀子合置一處令女
自識女見大喜卽取先者

齊諧記

啖膾鱉

晉有麻姑者好啖膾華本者好啖鱉臠二人
相善麻姑見一鱉大如釜尾是大蛇繫之一
月盡變成鱉取作臠召本食之非常肥美本
強令麻姑食之姑啖一臠有物塞喉不下開
口見本本見一蛇頭開口吐舌本驚走本後
得大蛇作膾喚姑食甚美苦求此魚本醉家
人牽蛇餘肉來姑見之嘔血而死

針腫

有范光祿者病脹脚腫忽有一人不通名便入齋中云佛使我來理君病因針腫上出黃濃水三升許而去其病遂愈

白獺

魏徐邈善畫明帝游洛水見白獺愛之不可得邈曰獺嗜鱒魚乃不避死遂畫板作鱒魚懸岸群獺競來一時執得帝曰卿畫何其神也

類說卷之五 終

